

己四料簡 ^二	《瑜伽師地論卷七十九》〈攝決擇分中菩薩地之八〉
庚一問	問：如說五種入正性離生，此中聲聞入正性離生，若諸菩薩入正性離生，等於法界如實通達。此二差別云何應知？
庚二答 ^二	
辛一略說法界 ^三	
壬一標	答：略說法界有二種相。
壬二列	一者、差別相，二者、自相。
壬三釋 ^二	
癸一差別相 ^二	
子一牒列	差別相者，謂常住相及寂靜相。
子二隨釋 ^二	
丑一常住相	常住相者，謂本來無生法性及無盡法性。
丑二寂靜相	寂靜相者，謂煩惱苦離繫法性。
癸二自相	言自相者，謂於相、名、分別、真如、正智所攝一切法中，由遍計所執自性故，自性不成實法無我性。
辛二能入差別 ^二	
壬一辨 ^二	
癸一聲聞 ^二	
子一通達作意別 ^二	
丑一通達 ^二	
寅一標	此中聲聞，由差別相通達法界，入正性離生，不由自相。
寅二釋	以通達彼故，由無沒想及安隱想，於法界中得寂靜想，於一切行一向發起厭背之想。
丑二作意	又復不能於彼相等所攝諸法性不成實法無我性如實了知，唯即於此法界定中，由緣法界差別作意，無相心轉，非由緣彼自相作意。
子二迴向趣寂別 ^二	

丑一迴向	或復因他為其宣說法界自相，聞已一分迴向菩提聲聞，極大艱辛，然後悟入；既得入已，精勤修習。
丑二趣寂	一分一向趣寂聲聞，極大艱辛，少能悟入；而不入已，精勤修習。
癸二菩薩 ^二	
子一總顯通達作意差別 ^二	
丑一通達	若諸菩薩，俱由二相通達法界，入於菩薩正性離生。
丑二作意	入離生已，多分安住緣於法界自相作意。
子二別釋通達作意差別 ^二	
丑一徵	何以故？
丑二釋	由於法界緣差別相多作意時，速趣涅槃；故多住彼，於阿耨多羅三藐三菩提非正方便。
壬二結	當知雖等通達法界，由此因緣而有差別。
己五釋名三世三輪清淨	問：如說三世三輪清淨，云何三世三輪清淨？答：由遍計所執自性故，於過去、未來、現在諸法，平等平等以如實慧正觀察時，於過去、未來、現在法中，無有顧戀、希望、染著，是名三世三輪清淨。